

元敕赐翰林直学士亚中大夫车都尉 追封渤海郡侯欧阳公 神道碑铭

翰林侍讲学士，通奉大夫知制诰，同修国史，知经筵事臣张起岩奉敕撰。

奎章阁学士，院侍书学士，中奉大夫同知经筵事臣夔乚奉敕书。

奎章阁学士，院承制学士，中奉大夫兼经筵官臣尚简奉敕篆额。

今皇上即位之三年，至元改元冬十一月三十日，奎章阁大学士，臣沙腊班奏翰林直学士，臣元职翰林论思有劳，制赠其考官三品，爵列侯，欲著之碑铭，光彩上恩，其敕翰林臣起岩撰文，奎章阁臣夔乚书丹，臣师简篆额上曰：可臣起岩承诏伏惟延祐初年，仁宗圣文钦孝皇帝，继述祖训，建立科举，大廷策士臣元、臣起岩，赐第拜官为同年，皇上御极简擢侍从臣元、臣起岩、代言紬史为同官。明诏谕，臣俾扬其先烈，发其潜德，求之臣职，揆之友谊，皆不敢辞。谨按公考讳龙生，字成

叔，欧阳氏，其先冀之渤海人。从晋南渡，徙长沙，率更令询以文学显名隋唐，四代孙琮为吉州刺史，因家庐陵，琮八代孙万，为安福令，故又有居安福者。安福令公而下，四代曰效。三子：谟、託、詒。託徙吉水后，吉水析置永丰传二代，是为宋太师究国文忠公之考，崇国公其他子孙散处安福邑境，雍熙初，割安福置分宜县，隶宜春郡，故居安福永丰者籍庐陵，居分宜防里者籍宜春，而安福分宜地相去不满五十里，公防里族也，别号防里欧阳氏。曾祖安时及祖新，皆漕试湖南，爱浏阳山水之胜，又徙居焉。新字仲斋，以经学著称，淳祐末荆溪吴公子良，漕湖南辟庐陵，欧阳巽斋守道为岳麓书院山长，又以礼聘仲斋为讲书，因寓长沙，巽斋聆其讲说，叹曰：“长沙自有仲斋，吾何为至于此”。考逢泰字仲叟，经述行业，师表一方，学者常数百人，擢科登第相属也。用荐为潭学，录安抚司檄，与湘潭谭景衡履学田烟没者，登故额士廩以美庐陵，罗子远在教授席，赖其佐助为多，今赠中顺大夫礼部侍郎、上骑都尉，追封渤海郡伯。妣何氏渤海郡君。公年十六入潭学，已负俊誉，月试占高第相国。古心江公判潭州贴为崇礼斋长，又二年，从醴陵田氏受春秋三传，甲戌混试国学生，湖南终场万三千人，有奇拔士二十八人。公以春秋中第二，肄

业存心斋时，罗教授为朝官，以书贺云：彘潭学经界忠叟景衡尽心焉。去岁景衡子魁乡荐，今年忠叟子入上庠造物，报人不爽如此，至元丙子内附侍礼部，还浏阳居霞阳山之白云庄礼部。晚岁，究心大元作律历，统元图书数十卷。因耗心得渴疾，公泣谏不为止，未脱稿卒。公抱其遗书每恸哭至绝，左丞崔公斌行省于潭，召之以亲老辞，居山十有七年。部使者至浏阳有文靖书院祠，龟山杨先生沦废于邻，使者考郡志谋复其旧，询众求才望士任斯责。众以公对，乃专县尹杜元忠即山中延至会有司例试，儒户中选者，复其身。使者命公考士湘阴、浏阳去取，公当人至，今称之宪部荐其才，牒宣间达之省府，授文靖书院山长。郡人强之起始，受命改筑书院猿啼山之阳。逾年，礼殿讲堂门庑斋舍及龟山先生祠事，内外具举学者云集书院，廩稍不瞻，佐以己资，夫人亦彻奩具助其经费。落成之日，升堂讲孟子承三圣章，言龟山先生传，周程学而及豫章延平，紫阳朱子实承道统，斥王安石配享孔庙，功亦可配。孟子山林老儒，闻书院之复筵，讲至为出涕，秩满牒之京师，赠太傅鲁国康里文贞公，野斋翰林李文正公，抑庵集贤，宋公交荐为校书郎，行就职矣。会集贤言，欧阳山长有功，文靖书院今浏阳升中州，例设教授师席，初筵须宿儒硕望，启迪

来学，宜移教其邦人，便朝论是之改。浏阳州儒学教授至，则会学廩可膳二十人，月约一十五日，选俊秀补员会食，躬亲教督诸生，皆勤勉自力，科场既辟，进士辈出，实公权舆之迁道州路，教授道介两广或以为远，公曰：“兹为周夫子之乡，何远之有”？至官郡庠邻，濂溪书院公定规约，朔望谒宣圣毕，教授率诸生谒濂溪祠。一日过祠东，见老屋数间，询知为西山精舍，胜国时祠蔡礼通芜废久矣。祠旧隶郡庠，有田百五十亩或利其入欲兼并之，故以屋僦军官，去遂不治，幸其连坏，公立召仆夫拚除按籍得田修其祠郡，郡学田多为豪民据有，公请诸宪司，被檄往括暑行山间，得租三百余石，因感疾归卒官舍，至大元年八月五日矣，年五十有七，诸孤奉柩归以三年，十月三十日葬郡东罗田之木瓜埭。公既没之七年，当延祐甲寅元举进士，魁湖广省贡，明年乙卯以第三人赐第同知平江州，迁芜湖尹，初赠公承事郎，同知湘阴州事再赠朝列大夫，同签太常礼仪院事、上骑都尉，追封渤海郡伯。今赠翰林直学士亚中大夫、轻车都尉，追封渤海郡侯。初娶谭氏一年卒，再娶李氏金陵仕族，有妇德知书，前公十年卒。初追封宜人，晋封渤海郡，今封渤海郡夫人。继室李追封长沙郡李夫人。有子曰：浩，龙川书院山长，娶唐渤海郡夫人，有子五，

长贞孙石林书院山长，娶王。次定孙曲阜林庙学录，娶李次元也。今中奉大夫，国子祭酒，依前翰林直学士知制造，同修国史，娶谢，封渤海郡夫人。次宪孙，幼鞠外氏李，沅陵县学都谕。娶汤季彭年举明经，娶周。女二，长适武冈路教授卜天佑，次适瑞州云石务税使汤居恭。孙男八，长庆以教授借注建昌路乐口，砦巡检次进暹邇逊达皆业儒。女孙六，曾孙男四，曾孙女四。公仪表峻青、莹如玉，有胆略干局，性孝友。幼岁尝封股肉以已母疾，兄士高蚤，世抚其遗孤皆有成。婚嫁必先兄子，而后及己子。先畴悉推与之读书，目五行下。八岁属文，十五下笔万言。文雄浑有体裁，学精敏有识趣，尤长于讲义理，每讲篇出士传诵之晚，号云庄有经学，理窟云庄讲议，及所著文集传于家。欧阳氏世以文学名庐陵之族，大显于宋矣。宜春防里青门素业，文行有传至于礼部，倡明经学师道尊严，表率多士。公学为通儒，行为士矩，宣劳庠序，位不满德，维持斯文，克肩其任，再世如一遗。善后人是有良嗣，首擢巍科，声华赫然，演论玉署，黼黻帝猷，追封二代，有位有土大书表隧恩贲没存，则公父子平昔纘学卫道之报，昭然四达。而防里之族克昌以大将媲美于庐陵矣，于戏盛哉！

铭曰：

惟欧阳氏，庐陵别族。有家浏阳，同出安福。
文忠相宋，魁然大儒。防里青门，世德不孤。
操义风烈，坚持允蹈。服膺克绳，义方之教。
三代之英，士生其时。世其道德，以怡以熙。
至行应古，乡邦攸重。士子景从，如鸟归凤。
卫道育才，再世一心。播耒百年，有获斯经。
论章载颁，直登侯伯。霈恩所生，于渥其泽。
大君赐命，词臣敬承。撰铭发潜，配休庐陵。
宣昭幽显，帝仁若天。垂世无垠，可千万年。